



沈忠敏公龜谿集卷第六

表

謝除御史中丞表

一節造朝已玷持書之舊十行錫命遽叨執法之榮
危惘上陳溫言狎至覩顏就列攬涕知慙

中謝臣

竊

以風憲之司政事所繫臺綱正則百度舉國論定故
群慝消專務抨彈寧容畏忌必也深達治體更練事
情本之以仁厚愛物之誠加之以正直事君之道身
任衆怨屹如柱砥之鎮頽波言切上心沛若巨魚之

縱大壑俾率其屬克大厥官伏念臣多病早衰少徒
寡與叨蒙異睠祇罄孤忠危哉樓子之言將共扶於
公道甚矣汲黯之驚嘗自觸於駭機一去天墀甫更
歲籥召從下澤歸覲清光心驚仗馬之鳴初疑昨夢
目駭臺烏之集復守故棲空貽尸素之譏敢有超遷
之望忽傳明命驟躡峻班寵過食浮莫遂循牆之避
位高責重更深臨谷之憂此蓋伏遇

皇帝陛下自誠而明能哲而惠群策屈群力並輯謀
猷之良公事當公言兼收聽納之美察臣論每專於
國計憫臣志獨緩於身謀出自親除就加器使臣敢
不益堅素守仰稱殊私明目達聰乃廣求言之路摩頂
放踵盡是報恩之身

謝賜對衣金帶鞍轡表

太裳出笥加寶帶之爛然履輶在庭傳華韉之沃若

叨光焜耀顧影徘徊

中謝

伏念臣才不逮中識非致

遠念起家之寒甚驚卷髮之班如早對妻孥嘗動王
章之泣晚懷鄉里寧忘馬援之言頃荷宸慈再紆召
節故里靡容於懷紱舊班俄俾於乘驄寢冒寵私每

踰分願此蓋伏遇

皇帝陛下仁深約已禮厚好賢藩飾庶邦不待無衣之請命駕馭多士使知有駸之在公特示匪頒以昭睠遇臣謹當依附日月黽勉夙宵負赤芾三百之譏偶先結綬竭駑馬十駕之力敢後著鞭

謝除吏部尚書兼權翰林學士表

柏臺五院之游屢經冒進蘭省六卿之列首玷超除更被詔函兼陪辭禁寵榮併集愧懼交深

中謝

伏念

臣涉學迂踈起家寒瑣寸心許國但知直道而行片言得君肯借游談之助悼奇節之未有慚它技之猗無祇以孤忠數叨異數擇笏而賜李絳獨蒙曲誤之知前席而見賈生每奉清閑之燕念殊恩之難報宜嚴譴之必加豈謂忽拜明縉躋華序從事銓衡之地力已弗勝寓直翰墨之林才將焉彊靡容俯僂采積戰兢此蓋伏遇

皇帝陛下叡知先知英武大度勤於接下圖宣王復古之功寬以用中得成湯立賢之道矜憐狂直之末躡寘峻髦之先臣敢不外竭罷駑中存丹赤上山濤

之啓事何敢不公章陸贄之詔書終憂靡稱

謝兼侍讀表

軒墀載橐備甘泉之近班帷幄執經紹金華之絕業
皆極儒臣之選悉繇睿主之知銜恩有加收涕無所

中謝

伏念臣資材驕甚誦數缺然學者以聖王爲師
歎清光之難望春秋乃天子之事懼微言之罕通豈
圖申錫贊書更侍便坐討論三傳之旨參陪五學之
游莫遂循牆終宜避席此蓋伏遇

皇帝陛下道侔天運德懋日躋左右惟其人輯搢紳
於燕閒之際終始典於學脫筆削於廢錮之餘致誤
簡知與叨紬繹而臣丹心獨在華髮半空因事獻言
雖欲殫千慮之得斷章取義豈能副多聞之求僂僂
以還跼蹐而已

謝除職名宮觀表

叨榮帥闔甫回南紀之行養疾祠宮復忝西清之直
荷大恩之委曲撫孤跡之凌兢形影自隨涕洟交溢

中謝

伏念臣家世寒甚質狀眇然不虞朴拙之易危
殆至迂踈而難合祇憑直道屢發狂言每期特立而

獨行是致多仇而少予向紆三組本繇上聖特達之
知寔閱九遷彌處衆人必爭之地了無裨補積有罪
愆間蒙賜對於燕朝數丐投閑於散地迨膺重寄自
列初心何敢徇於身謀誠恐乖於國事旣寬威命亟
下俞旨望蓬萊之昔游雖云引去指柴桑之舊隱儻
遂來歸祿賜尚豐寵名益侈此蓋伏遇

皇帝陛下皇明並照聖度兼容馭衆得官施之宜圖
功乘事幾之會憐臣蠢愚有守蓋嘗備腹心之臣察
臣緜弱無堪不復責爪牙之事故捐異渥以佚殘骸
臣敢不追悟昨非退安素分魂煢煢而去國莫效餘
忠思翬翬而慕君庶存晚節

賀冬至節表

律隨候應驗一氣之潛萌卦以類通知七日之來復

中賀
恭惟

皇帝陛下龐恩浹物剛德御時圖回每惜於分陰恢
復靡忘於尺地法官展采將陳亞歲之儀神筴延年
必享後天之福臣屏居故里阻預周行測舜日之長
徒傾葵藿望堯雲之近分隔泥塗

謝知鎮江府到任表

奉祠真館本避寵而投閑試守名邦忽叨恩而任劇

已布哀矜之詔庶銷愁恨之聲下聽民言皆知上德

中謝

伏念臣衰羸多病朴拙少文奮身無半面之交

最爲孤立遇主有一言之合亟被深知向塵耳目之
司卽受腹心之託雖觸犯忌諱每恃包容然排擊姦
邪多招仇怨而臣忠在許國義難徇人迨陞銓總之
曹采積顛隳之懼稍求散地俄奉俞旨一自去於朝
班已再更於年所形潛窮谷方追麋鹿之游夢入修

門空想鵷鸞之侶敢圖簡記復玷使令矧此凋殘之
餘居然控扼之要江山猶昔雖云襟帶之存城郭已
非但見丘墟之積志徒策勵才豈堪任此蓋伏遇

皇帝陛下罷使群才陶成庶類念臣進繇親擢姑務
保全於始終察臣退在自安更令揚歷於中外肉骨
之恩逾厚糜軀之報益堅誠恐技窮敢辭責重謹當
奉承德意勞還緣晦之民憑藉威靈和輯扞邊之士
粗能辦職猶覬乞身

謝除吏部尚書表

擁麾臨郡靡聞治狀之優曳履還朝忽拜召音之迅
班聯雖舊眷渥彌新中謝伏念臣奮跡孤生受知明

主越從羈旅之次寘在英游之間六年于茲一節以
守犯顏狂論仰翳全度之容率意妄行頻觸駭機之
發頃違表著退卽丘樊庶少避於滿盈亦苟逃於罪
戾恩緣謀帥詔使牧民雖公家之利無不爲粗識所
嚮然軍旅之事未之學終媿斯言曾坐席之未溫已
賜環之亟下自驚衰朽重歷禁嚴此蓋伏遇

皇帝陛下信順尚賢聰明稽古多士雜選皆洞照其
肺肝群胡跳梁已陰得其要領將開興運並用舊人
如臣等夷亦在比數臣敢不激昂於事洗滌其衷涉
世蹈憂患之途其身已老報君持忠義之節此志不
移

謝除兼侍讀表

召節始頒已冠六卿之列除書繼下亟從五學之游
拜命便藩撫躬跼踖中謝竊以顧問之職講讀爲榮

在漢褒絕業之功第參陪於貴戚至唐修更侍之令
遂專用於耆儒洪惟本朝遠鑒前代御邇英之便

坐延勸學之近臣貴德上賢本以示四方之好惡分
章擿句又將質千載之是非必惟其人庶益於國伏
念臣聞道最晚涉世甚迂頃蒙特達之知頻侍清閑
之燕考 祖考已行之事每獲口陳誦春秋不刊之
書終慚膚引矧茲塞訥之素加以衰羸之餘復玷克
員益難塞責此蓋伏遇

皇帝陛下道惟天合德與日新能自得師者王豈清
光之可望智而好問曰聖猶多聞之是求乃緣舊恩
而及凡品臣敢不勉羞薄技務竭精思收之桑榆心
歎東隅之失出於涯涘魂驚北海之觀

辭免除叅知政事表

任重人微敢殫危悃恩隆命確未錫俞音更陳迫切
之辭仰瀆蓋高之聽

中謝

伏念臣章句之學拙於濟

時田野之資昧於謀國徒以四海至孤之跡曲荷九
重特達之知徧歷高華曾微補發比膺召命復長銓
曹方日俟於譴何遽叅陪於機政况風塵之警未息
郊壘滋多而宵旰之慮益深朝綱猶紊東求誤及稱
塞愈難伏望

皇帝陛下徧察猷爲先求望實公回宸渥別授時英
雖獨智之有臨宅心奚隱苟衆聽之無咈反汗何嫌
謝除叅知政事表

召還朝著久懷未報之恩擢與政塗忽拜已成之命
顧丹衷之屢控念淵聽之莫回寵極而憂感深以懼

中謝

伏念臣起家農圃託業詩書寢驚麋鹿之姿進

躡鵷鸞之序落落難合特直道而靡它皓皓易污撫
危蹤而甚慄每聞九重嘗膽之誓安發一介嬰鱗之
言見謂小忠曲蒙殊獎雖中外之使令莫效而初終

之眷遇不衰欲竭微勞敢遺餘力詎意聖神之求舊
遽先毫畷而用臣驟寘廟堂叅陪帷幄况四郊多壘
之際贊一日萬機之繁蒐粟練兵適欲靖方隅之亂
圖事揆策又將振朝廷之威孰謂薄才能勝重任莫
遂循牆之請更深據蒞之思勉奉溫言實形慙汗此
蓋伏遇

皇帝陛下恢張庶政延攬群才憐臣孤立於時素受
腹心之託察臣多闕於事庸備股肱之求亟下異除
悉從英斷臣敢不依附日月警戒夙宵同寅協恭深

懲比德之害砥名礪節上副康功之圖

謝賜牙簡金帶表

使騎星馳權傳里巷賜奩天降光動指紳中謝伏念

臣卷曲散材拘攣末學少希柱頰迎爽氣於朝來晚
厭折腰揖清風於颯至豈謂奇孤之跡每蒙曲誤之
知束帶以朝久汗近列擇笏而賜嘗拜異恩更緣不
次之除復冒非常之寵便蕃所寄俯偃奚勝此蓋伏
遇

皇帝陛下德洽九圍文飾萬象輯康功以綏區夏粲
徽數以厚臣鄰遂致屏庸亦叨華煥臣敢不退循紐
約深戒倒持服映輕裘自足託臨戎之狀制踰文竹
固宜堅擊賊之心

謝賜生日羊酒等表

使馭星馳詔函天降寵將飮賜榮賁私庭伏念臣系
緒寒微技能淺薄親蒙殊獎叨與繁機一節不渝雖
每虞於顛沛千鍾弗洎終永念於劬勞適紀左門之
殊更拜上臺之餽貌無足稱悻不自任茲蓋伏遇
皇帝陛下隆禮養賢至誠接下睠言體貌用爲邇列

之光式是匪頒不廢彝章之渥臣敢不益推朴學深
戒素餐責食功於後圖酬恩何有佩移忠之先訓畢
命以之

辭免扈從轉官表

褒典超踰敢傾危悃寵辭敦勉尚嗇俞旨

中謝

伏念

臣猥以薄材誤蒙殊用屬羽書之紛奏扈革輅以親
征協贊宸謀旣乏徙薪之策肅清邊警又無橫草之
功躡進崇階坐饗異賞雖聖恩之過厚在愚分以難
安忝冒何名人言必至控陳未力天聽莫回再犯雷

霆之威更殫螻蟻之懇伏望

皇帝陛下推仁從欲體道觀能念帷幄之近聯已爲
榮耀收絲綸之成命庶免顛躓儻私願之獲伸亦公
器之增重

謝扈從轉官表

靈旗電掃克成郤敵之功清蹕天旋爰舉疇勞之典
固辭弗獲冒受奚堪

中謝

竊以逆臣逋誅久寬鈇鉞

黠虜借助復動干戈邊遽初聞宸謨已決乘六師之
共憤屈萬乘以親征貔貅鼓行蛇豕奔北旣獻俘而

奏凱宜告廟而策勲臣於其間一無所補猥緣近列
濫進崇階此蓋伏遇

皇帝陛下比迹堯仁同符湯勇威加敵國更收不殺
之恩禮厚臣隣寧畀無名之賞倘因微用數勸羣工
而臣選懦弗彊迂踈何取修車攻復古之政雖許與
聞從奉天定難之臣則爲忝竊尙圖微效庶答鴻私

謝賜御書車攻詩表

使鑣馳騫俯傳天語之溫宸翰騫騰上應奎文之爛
光生篋笥榮動搢紳中謝伏念臣猥以凡才叨蒙異
獎每奉萬幾之暇數窺一札之工至若採石鼓之遺
篇灑銀鈎之妙蹟因辭見意更踰宵雅之肆三與世
作程彌識帝書之第一敢圖珍賜遽及孤生此蓋伏
遇

皇帝陛下盛德日新多能天縱將芟夷於大難以紹
開於中興憫周室之詩亡四夷未靖笑武宋之字大
八法不傳故於遊戲筆墨之間不忘恢復境土之事
憐臣衰鈍賁此寵休臣謹當襲藏私門傳寶來裔泛
洪源而俟舟楫遠符遇主之榮因田獵而選車徒庶

稗復古之政

謝賜生日禮物表

臺饋俯盼特示朝彝之渥詔函荐至誕昭帝眷之優
恩重命輕感深涕溢中謝伏念臣家世寒甚資材蔑
然叨被誤知濫塵近列雖有憂時之志欲罄愚衷會
無經國之謀可裨聖畧居慙尸素已凶退閑適及幼
勞之辰敢拜便蕃之賜載陳懇款上瀆睿明更紆雲
漢之章終施雨露之澤餘生何幸首路爲榮此蓋伏
遇

皇帝陛下禮厚養賢仁深及物憐臣久陪帷幄嘗參
預於股肱念臣將遠軒墀遂曲全於體貌肆於是日
因寵其私臣敢不仰認至懷堅持素守大恩難報固
已媿於初心微軀可捐更當期於晚節

謝除職名官觀表

引分投閑肺肝屢罄蒙恩賜可體貌益加厚餼廩於
珍祠峻班聯於秘殿拊躬僥倖去國徊徨中謝伏念

臣受生么微振迹踈外親逢堯舜之明主願爲稷卨
之良臣寔被異知遽聞大政任遇極矣報效蔑然懷

方隅多故之憂未能徇國起丘園獨往之願何忍潔
身而臣性本蠢愚論多迂濶不足陪廟堂之末議何
以綴帷幄之近聯俯仰而思進退以懼恭惟 仁聖
保全之賜每在孤危顛沛之時用特殊私曷陳誠懇
顧豢安之何敢寧整毒之是虞祇荷天慈曲從人欲
雖到家百里實異柴桑之折腰然受粟三鍾殆似支
離之攘臂感淪骨髓愧溢面顏此蓋伏遇

皇帝陛下禮厚使臣仁深恕物察臣愚衷斷斷第盡
事君之小心憐臣過計拳拳詎咈濟時之大畧故全
終始之眷以爲出處之榮臣敢不追數昨非堅持晚
節鳧鴈來去甫遂江湖之游狗馬歿生曷舍蓋帷之
戀

車駕巡幸平江府起居表

靈旗討罪前薄淮瀆清蹕撫師進臨吳會天聲震疊
士氣奮張中謝竊以彊狄怙衆而憑陵叛臣乘時而

僭竊禍亂之酷星籥殆踰於十周戡定之難宸筭靡
忘於一日蓄威以俟慮勝而行枕戈而復晉讎人懷
此志折箠而興漢祚天與其時乃卜盛秋之期大恢

前歲之舉師出以律后來其蘇恭惟

皇帝陛下勇智正於萬邦孝悌光于四海痛兩宮之未返戀極晨昏憫百姓之無辜憂深宵旰茲慰雲霓之望不憚霜露之勞將致中興亟修大養邦圖再造克臻九廟之安國步一清自格三靈之祐臣頃以弱質叨備近聯輒自去秋屢陳大計謂用兵當四面而出恐審敵在一年之間疏牘具存冕旒開網雖眷遇之私備至而尸素之媿彌深引分乞身銜恩去國訪散人之遺迹已甘終老於丘樊望屬車之後塵猶記首陪於羈勒第存丹赤早見升平

轉官許回授與兄謝表

陟岡之念仰徹於聰明出綍之言俯加於眷獎乃回

公渥以遂私情

中謝

伏念臣一遠天墀十移月籥齒

衰撓疾分宜屏於丘園罷溢挺災誠恐填於溝壑空守不移之志長懷未報之恩曾謂微勞遽叨殊寵顧事爲之彌稱控避懇而莫諧爰念急難曷陳迫切雨露之澤旣霑被於同根雲漢之章復表揚於異數兄弟感泣父老歎咨夫何差池有此僥倖茲蓋伏遇

皇帝陛下堯舜孝悌文武憂勤賞以懋功圖日新於
庶治化惟美俗用風勸於多方是致願私果蒙褒允
臣敢不體認德意佩服訓詞白首相依喜益敦手足
之愛丹心猶在誓將期頂踵之捐

辭免除同知樞密院事表

寵命驟加方懷震惕愚誠昂貢未賜矜從敢忘犯上
之誅更罄由衷之懇

中謝

伏念臣頃以弱質叨汚近

聯驚歲序之荐更寢妨賢路悼事功之蔑著上負聖
知所宜養疾於丘園遂請辭榮於廊廟仰繫全度俯
佚殘骸豈圖仄席之求未忍遺簪之棄召趨_之室之
對擢奉露門之游一望清光再蒙殊用念進讀清閑
之職猶懼濫居顧本兵樞要之司詎容虛受上旣關
於國體下必致於人言伏望

皇帝陛下曲軫天慈特回淵聽察臣空踈已試之技
固自無庸憐臣疋殘旣老之身豈能有補追還成命
別選異才儻忘反汗之嫌必免曠官之悔

謝賜生日禮物表

衰遲無補復玷於近司眷渥有加更叨於蕃錫適丁

變故尚軫慈憐中謝伏念臣初乏事功久尸榮祿老

養弗洎劬勞之感何窮恩紀未酬疲曳之軀已老甫

及門弧之日重慙臺餉之儀兩居其官三拜此賜茲

蓋伏遇

皇帝陛下推誠接下隆禮使臣圖任而責成功寵賚

以將厚意致身如此報國云何佩先訓之羔方罔敢

失墜慕前修之忠節盡至糜捐

謝除同知樞密院事表

進陪帝學方趨召節之嚴參秉國樞俄被制

牢辭弗獲冒處徒慙中謝伏念臣頃以譎能誤膺殊

睠擢寘群賢之右與聞庶政之幾過計拳拳每欲謹

後車之戒空言落落豈能濟前箸之籌更拘俎豆之

聞終昧甲兵之問技乃止此才則使然恐孤負於明

時思退休於晚歲敢意寵私之未慙亟從閑外而見

收遽傳趣行便朝賜對授以本兵之任贊夫經武之

圖然臣已試何功既老馬用血誠甚瀆汗號莫回雖

駑馬十駕之勤非敢後也而鈇刀一割之利其可再

乎偃僂拜恩赳赳就列此蓋伏遇

皇帝陛下堯仁天大湯德日新延攬英雄務兼收於
群策恢復境土期盡雪於大讐遂致衰遲亦叨圖任
臣敢不益勵誠節旁咨智謀依日月之光固難施於
爝火感風雲之會將少效於秋毫

辭免除知密院事表

寵命頻仍已駭聞於朝著愚衷激切遂冒瀆於宸聰

載錫溫言尚稽俞旨

中謝

伏念臣寅緣拙直被遇聖

神識本昧於經綸言多涉於迂闊比自召歸帷幄擢
贊樞機執羈勒以從雖與近臣而在列習金革之事

則非平日之所長深懼克員馴致曠職敢謂眷私之
渥驟陞等級之崇併閱三遷甫更兩月蓋大恩稠疊
矜遺簪之復收而小器滿盈思覆餗之當戒縱欲勵
捐軀之節詎能忘誤國之憂承命驚惶撫心戰掉是
敢控陳草芥之賤懇干犯斧鉞之嚴誅伏望

皇帝陛下聖度曲全皇明下燭察臣愚陋之質未有
報償憐臣衰病之身弗克負荷亟收誤獎博選真賢
儻獲就於舊班庶免貽於大戾

謝知樞密院事表

左官右府靡容坐席之温出綈中宸遽躡朝班之峻
寵光沓至感涕交流中謝伏念臣性質滯頑器能淺
薄徒緣異獎更踐要塗直道難行閱風波之屢變大
恩未報悼蒲柳之先衰顧忝曷之非宜獲屏藏之爲
幸比膺召節復贊事樞病骨支離愈不勝於策勵聖
謀宏遠將焉副於詢求蚤夜以思進退惟谷豈謂歷
時未幾身命已加初無尺寸可紀之勞越在二三同
列之右聞者甚愕心其獨憂旣控避之弗諧祇驚慙
而罔措此蓋伏遇

皇帝陛下堯舜孝弟禹湯憂勤至性過人方盡宅憂
之制沈幾先物不忘復古之圖如臣孱愚亦在推擇
臣敢不恪思其職勉稱所蒙事君盡忠之心造次於
是爲國復讎之計歿生以之庶效涓塵少酬天地

沈忠敏公龜谿集卷第六終

沈忠敏公龜谿集卷第七

奏狀劄子

殿中侍御史乞宮觀劄子

臣輒瀝血誠仰干 天聽伏念臣素苦心悸之疾每

一發動顛仆移時昨任臺察累具奏陳乞以宮祠自

便俞旨未賜卽有省曹之除拳拳愚衷無路自達繼

蒙 聖恩擢寘言職亟將使指指出按獄成涉歷冬春

方達行在竊自惟念孤危小臣初無左右游談之助

荐叨獎拔盡出矐知欲慕古人知無不言之義明目

張膽圖報毫分而臣命薄數奇心悸復作感冒風濕
脚氣乘之步履旣艱志意隨落徒以虜在近境日懷
憂責未敢引疾自陳今者殘虜渡江理無嫌避乃更
冒居彈糾之地貪祿養痾上負恩私臣實有愧伏望
陛下廓日月之照察臣悃誠特加憫憐除臣一官觀
差遣以休養殘骸不勝大願臣無任懇祈迫切之至
取進止

辭免除侍御史劄子

臣今月十七日准尚書省劄子奉 聖旨除臣侍御

史日下供職者臣竊惟 國朝故事御史府不置大
夫則雜端實貳承事日綴朝列例比從 臣恩禮旣優
選任必遴寅緣序進則爲非宜伏念 臣技能素薄齒
髮早衰昨蒙獎知擢寘臺屬據可言之地當不諱之
朝空糜歲時無補毫髮明神降罰疾病交攻比方謁
急臥家力祈閑散遽叨除命出處背馳不唯行已之
方有所未盡矧復要君之謗無以自明俾正官邪恐
傷國體伏望

皇帝陛下特回淵慮俯照危衷收還誤恩改授贖誓

察臣累牘假以真祠上以示朝廷因任之宜下以全
臣子去就之節臣無任懇祈迫切之至取 進止

辭免除侍御史奏狀

右臣今月初六日准尚書省劄子三省同奉 聖旨

除臣侍御史者聞命震驚罔知所措伏念臣天資驥
愚與世多忤昨蒙 陛下驟加獎遇擢寘風憲之

司曾無幾時徧塵三院每念大恩難報隨事輒言不
敢自爲身計終緣狂妄自速罪辜 陛下委曲保

全不忍遐棄美職善郡併昂寵除待次一年又蒙紀

錄召使入覲甫及行朝亟還舊物雖天地父母生成
之德周旋覆護豈復及此感涕流落不知所從然臣
已試無狀方務省循若更冒居何以厭服公議伏望
聖慈追寢成命庶於愚分少以自安臣下情無任
祈天懇禱之至謹錄奏聞伏候 勅旨

侍御史乞宮觀劄子

臣近蒙誤恩收召於罪戾之中再加技拭復寘舊班
仰惟天地父母之恩至大至深豈臣糜捐所能報稱
重念臣孤忠拳拳雖欲自竭而材識駑暗嘗負失職

之憂故於見聞之事晝度夜思精神憤耗舊有心氣
之疾近又發作不免披瀝血誠控告 君父欲望
聖慈哀憐除臣一在外宮觀差遣以養衰疾近來傳
報賊馬別無動息臣之請去可以無嫌况 陛下招
徠四方搢紳之士布在朝列多有賢哲可備耳目之
官如臣驚愚會何足數伏乞 陛下至仁從欲特賜
俞音寬假歲時少休間里儻或他日 聖恩未棄
則臣殫竭犬馬之力尚未爲晚臣無任懇禱激切惶
懼之至取 進止

辭免除御史中丞奏狀

右臣伏蒙 聖恩除臣御史中丞日下供職者聞命

震驚罔知所措竊以中執法之任是爲三獨坐之聯
所以鎮肅百僚綱紀萬事侍赤墀而簪筆參顧問之
榮剡白簡而飛章總領彈訶之重不有宿望曷副超
除伏念臣門族寒微性資昏懵徒以頃從末路驟對
清光一言偶合於聖聰三院徧叨於親擢天地之恩
至大不敢謀身螻蟻之生甚微唯知許國中緣狂妄
自速罪辜方懷紱而返故鄉俄賜環而歸舊列既踰

累月奚補萬分仰負睿知理宜投劾嘗陳危悃意欲
祈閑敢圖宸睭之益加亟自臺端而躡進臣之自揣
實不勝能儻或貪冒寵私俯僂拜命則必重增尤累
滿溢興災豈唯拂於師言誠恐墮於國體伏望 陛
下特回淵聽追寢誤恩改授真賢以安素分臣下情
無任懇祈迫切之至謹奏錄 聞伏候 勅旨

除御史中丞舉左司員外郎潘良貴自代狀

伏覩某官才周學富行峻識明考治亂之端智畧通
於國體辨正邪之分忠言切於人情出入十年始終

一節聲稱望實臣所不如舉以代臣實允公議謹錄

奏 聞伏候 勅旨

辭免除吏部尚書奏狀

右臣伏准尚書省劄子奉 聖旨除臣吏部尚書兼

權翰林學士日下供職者聞命震驚罔知所措竊以

天官六卿之長銓綜人物地極高華 祖宗以來惟

是詢求一時碩德宿望之士命使居之故夷夏知名

搢紳動色朝廷之上自然尊榮就非其才寧若虛次

儻緣恩賤輕以假人公言沸騰必至累國况復兼官

翰墨備極政事文章之選尤不可不御名也伏念臣迂

愚朴拙一無寸長遭遇 聖明誤叨器使待罪言路

首尾四年雖有拳拳愛君之心祇罄孤忠不為身計

然智識凡下昧於幾微何補事功徒積仇怨仰恃日

月之照幽隱必臨直道徑行不避讒謗終緣思慮過

當氣血衰殘涉秋以來十日九病適以迫近防虞之

際未敢祈閑遽蒙聖恩橫加庸品超躡眾俊併冒寵

除在臣之愚豈遑安處况臣少時學為場屋之文隨

眾覓舉既忝祿仕舊學已忘白簡之詞不拘音節尚

猶牽彊累日僅乃成章退省荒踈常懷跼蹐今復假

之禁林之直尤非所堪閣筆含毫何以塞責不免披

瀝血誠仰干 君父伏望 陛下特軫天慈追還

成命除臣一在外官觀差遣俾遂小休以安素分不

勝幸甚臣卑情無任祈天望聖激切屏營之至謹錄

奏 聞伏候 勅旨

辭免兼權翰林學士奏狀

右臣近蒙恩除前件差遣尋具辭免仍乞改除一在

外官觀伏奉 詔書不允所乞恭讀 聖訓感涕交

流竊念臣奮繇寒素初無寸長曲被神聖之知叨塵
耳目之寄雖盡言不識忌諱每荷包容然孤立不爲
比周終虞顛覆今者誤恩遽及二組兼紆在臣之愚
豈克勝任而况措紳留滯之久文籍散亡之餘銓總
失宜上下交病使臣夙夜殫竭駑塞猶恐不足以辦
此一職至於禁林之選翰墨是司當此多故之時凡
下詔令必欲鬯達聖意感動人心自非老於文學之
人孰宜居此而臣術業空踈語言拙澀文章體製旣
非素習加以憂深感疾福過挺災志氣凋零舊學都
廢驅之就職必誤使令不免再瀝血誠仰干宸造
所有銓總之職臣懼再三之瀆不敢更具懇辭惟是
兼權翰林學士實非微臣所當曷處伏望天慈特
回淵聽追寢施行不唯於臣愚分得以自安在朝廷
因任之際捨短用長責其實效不勝幸甚臣無任祈
天望聖激切屏營之至謹錄奏聞伏候勅旨

代狀

除吏部尚書舉左朝奉大夫直龍圖閣辛炳自
伏覩某官學有淵源行無瑕玷恢闓之略足以濟時

賸蔚之文足以華國恬靜介潔名重東南舉以代臣
實允公議謹錄奏 聞伏候 勅旨

辭免侍讀奏狀

右臣准尚書省劄子奉 聖旨除臣兼侍讀者聞命
震驚罔知所措臣聞傳說告高宗之言曰王人求多
聞時惟建事學于古訓乃有獲然則帝王之學不在
分章摘句而已蓋將務廣見聞施之天下之事業仰
惟 陛下聖學高妙超邁前王殆非群臣所能跂
及然猶追用金華之故事肆開經幄延訪儒臣宜得

博通經術深知治體之人命之勸讀或能發其所學
裨益聖聰以助成中興之治伏念臣不學無術自知
甚明加又病骨支離憂心憤亂昔所僅有廢忘一空
中臺峻劇之曹北門親近之職叨榮過當慚懼已深
今若更冒寵私不自上列紬繹之際必玷誤知伏望
陛下聖度曲全覆護其短追還成命別選英才上以
廣 陛下愛惜群下之恩下以盡微臣揣量私分

之義豈勝幸甚臣無任祈天望聖懇倒激切之至謹
錄奏 聞伏候 勅旨

乞罷除龍圖閣學士荆湖南路安撫使兼知潭
州奏狀

右臣今月八日准尚書省劄子奉 聖旨除臣龍圖
閣學士克荆湖南路安撫使兼知潭州聞命震驚罔
知所措臣竊謂國家多事之際固非臣子惜身之時
而况河圖峻職湘潭會府寵命併至於臣甚榮義當
馳驅卽日引道豈宜自列復有所言然臣有一介拳
拳孤危之慮不敢不控告於 君父之前者臣頃自
踈遠誤被矐憐亟從小官徧歷言路初無左右先容
之助盡出聖神特達之知故於軍旅之事素非思慮
所及比來或聞湖南殘寇尚復嘯聚而臣猥以弱材
驟當重寄必致敗事萬無可疑兼臣自荷擢用以言
爲職於今累年而臣天資驕愚志在展盡每荷天語
慰勉許賜保全不避怨仇實恃 陛下臣猶過慮
數凶退閑未替大恩尚嗇其去臣亦累嘗奏稟止緣
秋冬防虞之日未敢力爲妨賢之請而又私門禍患
病骨零丁皆俟初春盡當控訴非臣今日躬爲此言
若冒選除不自量力雖殺臣身何補國事伏望 聖

慈終始哀憐罷臣今來所除職名與一在外官觀使
得休養疾病儻臣未填溝壑猶冀他日萬一勉強以
報殊私冒瀆 天聽臣無任祈哀請命激切屏榮之
至謹錄奏 聞伏候 勅旨

除龍圖閣學士

伏覩某官學問淹該操行純潔望實之美見推士林
舉以代臣實允公議謹錄奏 聞伏候 勅旨

辭免再除吏部尚書奏狀

右臣今月初六日准尚書省劄子奉 聖旨除臣吏

部尚書者聞命震驚罔知所措伏念臣資材極陋家
世至寒親逢 聖明躡寘通顯試之中外顧五技之
已窮考其初終念一毫之何補省循涯分孤負恩私
理宜投劾以知非否則勾閑而免咎緣臣到郡方此
閱時恐涉避事之嫌未敢抗章而請敢意冕旒之眷
尚矜簪履之遺亟下詔除俾司銓總非臣糜殞所克
報償便合引途豈宜俟駕而臣頃叨已試自揣不能
雖尋繹弊端稍加懲艾然抵觸仇偶幾致顛隳今復
冒居重乘清議况臣血氣素弱疾疢交攻儻更貪於

寵榮將益挺於災釁不免俯披愚悃仰徹聰聞冀
軫天慈收還恩命除臣一在外官觀差遣庶公朝
當授受之際既曰得宜而微臣處進退之間亦爲有
據干冒天威臣無任戰灼屏營之至謹錄奏聞
伏候勅旨

辭免吏部第二狀

右臣今月十五日准進奏院遞到詔書一道已除
臣吏部尚書乘遞馬發來赴行在供職者恭讀訓
詞感涕交溢伏念臣草芥微賤無他技能仰蒙
陛下憐臣孤直拔於稠人之中徧塵華要併冒寵榮
臣徒有拳拳欲報之心而才分所局雖勤何補今者
治郡繁月未有善狀孤負使令愈懷震惕豈謂天
慈曲加記錄召以一節俾歸舊班洪惟生死肉骨之
恩雖殞百身曷能稱塞而臣已試無功加之疾疢嘗
具奏陳乞追寢成命改授臣一在外官觀差遣伏望
陛下廓天地之量回日月之明特降睿旨檢會臣
前奏施行庶安愚分臣只候向宗厚到本州交割職
事迤邐前路聽候指揮瀆犯天威臣無任惶懼戰

灼之至謹錄奏 聞伏候勅旨

除尚書赴闕奏知狀

右臣蒙恩除吏部尚書仰荷 聖慈紀錄感涕橫流緣臣自揣無堪尋具辭免於七月二十四日至平江府界准進奏院遞到 詔書一道不允所乞臣已卽時望 闕謝恩祇受仍迤邐起發前赴 行在臣無任感懼激切之至謹錄奏 聞謹奏

辭免侍讀奏狀

右臣今月初五日承吏部牒已降恩命除臣兼侍讀者聞命震驚罔知所措臣竊以 祖宗以來開設邇英延見儒臣命之講讀豈特取其章分句析考正所疑而已蓋將博求多聞宏益治道故凡咨訪之際或及國論之餘恭惟 陛下聖學日躋而有欽明抑

畏之盛德清光下臨群臣莫望然猶不廢邇英故事親御便坐下詢承學之臣當此艱難其選益重伏念臣少而荒疎老復昏忘退自尋索一無寸長頃被簡知侍經幃幄雖荷 聖度包蒙護其所短而忝冒非據臣猶知之况今衰病日侵舊學都廢乃欲追誦所

聞以卒金華之業縱不自量必負選任伏望 聖慈
察臣悃愫實非飾詞特賜追還誤恩改授英傑庶幾
足以仰副 陛下緝熙之學而臣之私分亦遂少
安冒犯 天威臣無任戰灼之至謹錄奏 聞伏候
勅旨

除吏部尚書舉度支郎中李元瀚自代狀

伏覩其官器質渾厚識慮精深學問有餘而敏於從
政操履無玷而嚴於律身舉以代臣實允公議謹錄
奏 聞伏候 勅旨

辭免除兼翰林學士劄子

右臣今月二十二日准尚書省劄子奉 聖旨除臣

兼翰林學士者聞命震驚罔知所措臣伏見侍從之
列被旨兼權他職多矣例不敢輒有辭免者恐涉避
事之嫌也惟是翰墨之林儒臣高選供奉述作既專
代於王言燕見咨詢實與聞於國論兼官寓直尤當
擇才而臣已試無狀不敢再冒恩除輒忘此嫌引義
自列重念臣本以田野之質學爲場屋之文音節疾
徐初非素習體製高下馬能彊知昨者迫於威命之

嚴黽勉兼攝辭氣卑弱無以鬯達德意之精微傳播
四方誠恐累國矧以連年憂患心志凋零口耳所傳
盡皆廢忘加又銓衡劇曹案牘填委稍稍撥遣動致
煩言夙夜究心猶懼不逮儻或冒寵貪榮復兼兩職
才力不副曠敗無疑縱蒙 陛下保全未加誅斥
而臣之私分何以自安伏望 聖慈察臣所瀝悃誠
出於迫切特賜追還成命改授能臣庶幾臣之短拙
獲免自暴實爲幸甚干冒 天威臣無任戰灼之至
取進止

辭免除參知政事劄子

臣今月二十八日准尚書省劄子奉 聖旨除臣參

知政事日下供職者臣聞天下多事則聖哲馳騫而
不足天下無事則庸夫高枕而有餘比自中原震蕩
以來天下可謂多事矣 陛下焦勞求濟八年于

茲更用大臣無論數十終未能仰副 聖心迄至于
今國勢未振 陛下當宁慨然念治愈切宜於是

時得瓌

御舊

卓絕之才以陪輔帷幄則戡定禍亂容

或有期如臣庸愚一無可紀躡寘華近日負尸素之

慙今日忽蒙恩除擢叅大政驚懼隕越不知所爲儻
或冒寵貪榮不自上列顛濟累國所繫非輕伏望
聖慈特回淵慮博求人望改以命之庶幾策慮設施
必能宏濟艱難以克稱 陛下知人之明非獨臣
之幸實天下幸甚臣冒瀆宸嚴無任惶懼戰灼之至
取進止

辭免賜金帶劄子

臣今月初七日正謝伏蒙 聖恩例賜臣對衣金帶
魚袋鞍馬緣臣於初六日已蒙 聖恩特降中使賜

臣毬紋笏頭帶魚袋今來儻或更拜匪頒之式則是
疊冒寵私在臣愚分不遑安處伏望 睿慈將例賜
金帶魚袋特行寢罷庶遵彝典免致煩言取進止
辭免轉官劄子

臣今月二十三日准尚書省劄子奉 聖旨爲昨措
置防秋中外協濟轉一官者聞命隕越若無所容臣
竊惟賞罰者帝王之至權辭受者臣子之大分賞不
以功則何以礪世受不以義則何以飾身伏念臣猥
以謏能驟膺殊賧越先群俊擢與繁機方成命之始

行屬遽音之已至亟聞聖畫決意親征扈警趨之嚴
雖叨奉引參帷幄之祕曾乏贊襄賴皇威之奮張
致敵師之犇潰凱歌初奏裒律肆盼逮及邇聯例蒙
曲澤退量僥倖益負兢皇况陛下旣收不戰之
功務存謙抑而微臣乃受無功之賞竊冒寵榮顧愚
分之難安知煩言之必起伏望

皇帝陛下深仁恤隱獨智察微特寢誤恩俯從私欲
豈惟御名惜名器以勸群工庶幾敦尚廉隅以風四海
取進止

辭免支賜劄子

臣等叨備政府方陛下親摠六師攘却大敵曾
無策畫仰贊宸謀迺者蒙恩冒進崇階實深慙懼
所有依格合得減半支賜正當財用匱乏之際義難
祇受欲望聖慈特賜寢罷庶於愚分有以自安取
進止

與左相等爲亢旱乞罷政劄子

臣等伏見天示變異亢陽爲災迺五月丙子不雨迄
至於今越四旬矣在田之稼將欲就槁中心惴慄恐

害有秋伏惟 陛下畏天之威責躬引咎精意禱
祈無所不至而星象昭回甘澤未應良由臣等叨冒
近司輔政無狀致斯譴告仰貽 聖憂伏望 陛
下特降 威命正臣等之罪早賜黜責庶幾上答天
心召來和氣以副雲霓之望臣等無任激切之至取
進止

再與左相等乞罷政劄子

臣等比以早暵之災乞解機政以答天戒伏蒙 聖
恩特頒宸翰開諭至意及降中使宣押臣等各赴都
堂治事伏荷 慈怜伏增感涕臣等竊以燮理陰陽
寅亮天地在古屬公孤之官於今爲宰輔之職苟或
政理之間不傷和氣則雨暘時若自格豐登廼中夏
以來亢陽如此水泉將涸禾稼向枯 陛下畏天
恤民憂形玉色禱祈備至嘉澤尚愆此實臣等才識
暗劣孤負委任所爲繆盭致傷天地陰陽之和厥罰
常賜咎證可考儻不明正臣等之罪亟加罷黜則何
以上弭天變下塞人言伏望 聖慈早降 威命施
行臣無任跼蹐屏營之至取 進止

乞外任官觀劄子

臣比以叨冒近司衰病無補嘗瀝懇誠仰干天聽
乞除臣一在外宮觀伏蒙 聖慈特降中使宣押臣
赴都堂治事仰荷 恩憐不勝感涕伏念臣才質駑
下本無他長誤蒙 聖知寘之帷幄每懼無以報稱
夙夜兢慚豈敢懷安妄爲去就誠見 陛下英武
大度慨然有興衰撥亂之志宜得當世豪傑預聞國
論相與協贊以圖事功如臣之愚久試無狀尚復頑
然坐尸榮祿素餐之罪其何可逃加以心氣發動智
識昏逾儻不自量顛隳必矣伏望 聖慈察臣悃悞
特賜矜從除臣一在外宮觀俟休養他日疾病少
間則捐軀之期似亦未晚臣無任懇倒迫切之至取
進止

謝賜鍍金銀鞍轡奏知劄子

臣前日伏蒙 聖恩特降中使賜臣繡鞵鍍金銀鞍
轡一副異數光華度越近比豈臣碌碌無補之人所
能稱塞仰惟天地父母之恩愈知難報感涕縱橫臣
近爲背上忽生一瘡跨涉旬餘腫痛不止因服疎利

之藥臟腑不安見請朝假一兩日將理緣此尚稽入
謝臣無任惶懼之至謹具奏知

謝賜御書車攻詩劄子

臣近蒙聖恩賜臣御書車攻詩今又蒙

陛下以臣草芥賤名特紆宸翰俾獲刻于車攻篇末託
於不朽奎鉤爛然光動心目臣之榮幸殆絕一時自
顧么微豈能稱塞拜賜之際感涕交頤仰惟陛下
下方修復古之政以圖攘狄之功而臣猥以空疎待
罪近列策慮無取宜在譴何拜此殊私以慙以懼惟
是畢命夙宵以贊中興之業則臣之志也何敢言報
臣無任感天荷聖激切屏營之至謹具劄子奏謝以
聞謹奏

乞出劄子

臣累日見都督府關取空名告勅宣劄等以萬數計
臣固疑其有所爲以問趙鼎張浚而鼎等不以告也
臣亦曾兩次留身奏稟恢復之事不可一日忘第須
審度形勢措置得宜一舉成功乃無後悔今日忽見
張浚傳奉聖旨浚有川陝荆襄之行此用兵之謀

固已素定臣初不以進取爲非而區區過計謂宜審而後行今遣宰臣之出此大議論也臣叨備帷幄乃不預聞蓋臣智識昏逾不足謀國坐尸榮祿實不自安伏望 聖慈除臣一在外宮觀差遣以安愚分他日未填溝壑尚能糜殞以報 聖恩臣無任瀝懇祈哀之至取 進止

乞出第二劄子

臣今早曾具劄子以臣智愚昏逾不足謀國遂瀝懇誠仰干 天聽乞一在外宮觀差遣伏蒙 聖慈特頒宸翰批降處分丁寧委曲仰惟天地父母之恩至深至厚非臣糜殞所能稱塞重念臣猥以一介庸陋之資遭遇 聖明越先群俊拔擢至此曾未有絲髮之功以報 陛下何敢數爲去就自干犯上之誅顧於朝廷大議多不預聞此必有以疑臣者而臣雖有憂國之心動成嫌間尸位素餐每深慚負彊顏就列實不遑安臣見家居待命未敢隨班奏事伏望 聖慈曲垂矜憫俾臣退就外祠少養疾病他日陛下儻賜記憐則捐軀之期似或未晚臣無任瀝懇

祈哀之至取進止

聖慈乞出第二劄子

臣比嘗兩具奏劄乞一在外官觀差遣伏蒙聖慈
 宣諭丁寧仰荷恩私不勝感涕然臣有區區之愚不
 免于犯斧鉞再控危誠重念臣智術空疎材力懸弱
 叨侍帷幄無所裨補夙夜震懼不遑安息豈不知同
 力一心共贊恢復必不以進取為非第欲審而後動
 耳而臣前日初不聞其曲折遂有奏陳若誠即有所
 為則是臣暗於事機謀議抵牾若猶未也則是臣實
 失於輕信致有憂疑况二相之外惟臣叅預機務有
 大舉措每以不知其詳而優疑紙牒豈可復陪國論
 伏望天慈特加矜憫俾臣解罷機務退就外祠少
 養疾病尚圖他日必有捐軀之所臣無任懇祈迫切
 之至取進止

辭免賜生日禮物劄子

臣伏蒙聖慈以臣生日特降中使賜臣詔書一
 道并羊酒米麩者使華脫鞅君使塞塗恩紀便蕃感
 涕流落伏念臣起家寒苦遭世艱危微軀未捐已愧

移忠之訓寵賚所及更叨將意之儀豈伊犬馬之生
能報雲天之施而臣濫陪帷幄著事功旣瀝懇於
軒墀行投閑於里巷跼踖俟命當解繁機周旋拜恩
殆非故事仰祈 睿照特軫慈憐覆護孤蹤追寢異
數庶全授受之分用爲去就之宜所有生日禮物臣
不敢祇受臣無任祈天荷聖激切屏營之至謹具劄
子奏聞伏取 進止

乞出第四劄子

臣昨以庸陋誤被 聖知越先英豪擢寘近列適當
前歲虜犯淮壖扈蹕總師前臨大敵荷 陛下眷

遇之深凡帷幄密議皆獲纖悉與聞臣亦思所奮勵
圖報萬一而愚慮無補夙夜不敢自安及虜騎遁逃
之後事歸督府凡有謀議雖胥吏輩徃徃皆知而臣
職在叅陪國論每獨不知臣以此益自愧懼累嘗瀝
懇凶閑 陛下眷留未容臣去輒復奏陳恢復大
略區區愚忠本圖協濟不謂張浚過有嫌疑動輒相
外前日浚倉遽而來人情驚詢以謂相臣動靜必不
苟然犇赴 闕庭當有大議臣旣未以罪去理合商

量委曲詢之藐不告語及臣留身具奏曲折方聞
玉音宣諭今日措置略如卿初言臣仰蒙陛下
待以腹心終始如一聖恩深厚感極涕零豈不懷
戀軒墀誓殫犬馬之力然今事之舉動繫國安危而
臣乃不得與聞自古未有此比豈敢含糊在列欲望
聖慈特賜矜憫除臣一在外官觀差遣以安愚分臣
無任瀝懇祈哀之至取進止

乞出第五劄子

臣以前日相臣倉遽而來中外驚詢以謂犇詣闕
庭必有非常之議而臣叨侍帷幄又復不獲與聞夙
夜懷慚俯仰跼蹐遂披誠悃上瀆宸聰乞解繁機
退安散地伏蒙聖慈特降中使宣押隨班奏事及
赴都堂治事仰荷聖恩曲全體貌雖臣糜殞豈足
報償再念臣自被親除至叅大政數陳恢復之略本
有協濟之心而臣才力弗彊智數無取惟主知之獨
厚顧宰論之莫聞服在股肱愧形面目雖艱難之際
敢懷靜退以安身然幾微之間恐以猜嫌而累國不
免再殫危懇冒犯天威欲望特賜矜憐檢會臣前

奏除一在外官觀差遣庶全孤節尚勵後圖臣無任
祈天望聖激切屏營之至取進止

乞出第六劄子

臣比者荐輸危惘冒犯宸嚴乞解政機除一在外
官觀差遣伏蒙聖慈再降中使宣押赴都堂治事
恩眷優渥不替初終報効莫從唯知隕涕伏念臣頃
繇孤遠遭遇聖明感於知憐思所奮勵常謂議和
避地恐成微弱之形積粟練兵審圖恢拓之計念芻
言之曲折荷天語之褒嘉志在必成期于協濟而

臣終緣拙直動致忌嫌適偶相臣犇赴行闕惟是
人情詢懼之際莫聞國論安危之幾名曰叅陪實均
責任踈外若此尸素何安惟恃保全之恩未至顛隳
之地俯仰循省夙夜驚慙是以不避瀆煩備陳覲縷
仰祈睿聽曲賜矜憐授以官祠投之散地庶欲全
於國體豈敢恤於身謀拳拳愚忠莫盡於此臣無任
祈天望聖激切屏營之至取進止

乞出第七劄子

臣比瀝血誠冒塵天聽乞解機務退就祠宮伏蒙

聖恩曲全體貌使華宣押于再于三待遇優隆始終如一感深淪骨涕淚交流伏念臣立身奇孤賦性蠢直仰恃主眷自信不疑而臣識慮不足以察人情之微謀謨不足以陪國論之末數陳恢復之略本有協濟之心嫌間既萌齟齬難合惟是乞身而去茲乃昔賢之規伏望 睿慈特賜矜憫亟從私欲免累誤知則臣未歿之年皆是捐軀之日臣無任祈天望聖激切屏營之至取 進止

乞出第八劄子

臣伏蒙 聖恩以臣乞解機務退就祠宮賜臣 詔書不允者需奏瀆煩累陳危悃璽書慰勉尚嗇俞音伏讀訓詞惟知感涕竊念臣以一介無庸之質荷萬乘非常之知孤立於朝自信所學每欲同寅而許國第知直道以事君顧愚忠之不移宜此身之必去盍歸畎畝難戀軒墀彌切拳拳之心匪萌倖倖之意仰祈 睿鑒曲軫慈憐終賜保全亟降處分庶存去就不負生成臣無任祈天望聖激切屏營之至取 進止

沈忠敏公龜谿集卷第七終

沈忠敏公龜谿集卷第八

劄子

辭免除資政殿學士知明州劄子

臣今月二十六日准尚書省劄子奉 聖旨以臣累

上章乞解機政退就祠官除資政殿學士知明州者
聞命感激涕淚交流伏念臣猥從踈逖誤被簡知寢
閱九遷叨塵二府念大恩之難報顧薄效之靡聞食
息省循夙夜震惕至於審圖恢復之計思濟艱難之
期同寅協恭旣初心之莫展投閑置散乃素分之是

宜比貢囊封數千 蕲聽竭愚誠之迫切荷 聖意
之周旋付以名城寵之峻職曲全終始之眷以爲去
就之光豈臣糜捐所能稱塞而臣深虞朴拙必致虧
濟是以不避瀆煩仰祈矜憫覬追還於異渥俾退就
於真祠庶保孤蹤尚堅晚節臣無任祈天望聖激切
屏營之至取 進止

辭免除資政殿學士知明州第一劄子

臣猥以一介無能之質誤被 聖知擢陪政路叨冒
無補夙夜懷慙遂瀝血誠仰干 天聽乞解機務退

就祠宮伏蒙矜憐曲全體貌名城峻職併冒恩榮豈
臣糜捐所能稱塞感涕橫溢九殞難酬臣雖已具懇
辭未奉處分重念臣朴拙之性第盡愚忠孤危之蹤
實恃異瞻儻忘素分定致煩言欲望 天慈終垂憫
察檢會臣累奏除一在外宮觀差遣庶存晚節期報
大恩臣無任祈天望聖激切屏營之至取 進止

貼黃臣於今月二十一日留身奏事歷陳危惻
既蒙恩許其去拜辭天陛之際 玉音宣諭當
全體貌盡禮而行仰荷瞻遇始終感深淪骨所

以跼蹐待命遂至浹旬竊恐中外不知招致物
論重費 陛下保全之賜伏望 天慈早降
處分亟遂官祠之請庶免顛隳

辭免除資政殿學士知明州第三劄子

臣伏蒙 聖慈以臣辭免資政殿學士知明州恩命
特降 詔書不允者危惘瀆煩粗殫萬一恩言慰諭
殆至再三荷 聖意之周旋撫危蹤而怵惕伏念臣
奮繇寒士本乏異能曲被冕旒之知參陪廊廟之列
一毫何補百謫是宜然考平日敷奏之言曷嘗不在

於恢復推老生朴野之學亦欲共濟於艱難而孤根
易搖薄命難偶每於曲折之際倍費保全之恩傾輸

肺肝控告 君父忠雖許國義盍引身仰蒙日月之

明俯察螻蟻之志詔函使騎眷禮有加峻職名城寵
榮併至旣逾私分荐具懇辭 天聽未回欲全終始

之遇人言可畏恐乖去就之方伏望 聖慈特賜矜

憫悉收還於成命亟畀付於真祠庶幾餘生免累洪

造臣無任祈天望聖激切屏營之至取 進止

辭免轉官上宰相劄子

伏念某頃者待罪政途之日適會朝廷重修祿令恭
被 聖旨參預典司及今書成奏御而某去國已歷
三時矣則是其首尾初無一毫之功乃蒙疏恩例叨
增秩聞命失次措躬靡安仰惟朝廷不忘舊臣借此
寵私以光衰朽然某居閑養疾而受無功之賞私情
公義皆所不安伏望鈞慈特賜敷奏追寢成命施行
庶安愚分除已別具奏聞外某無任懇倒之至

辭免 勅令所修書成轉官劄子

臣九月二十九日准進奏院遞到尚書省劄子爲勅
令所修祿秩新書成奉 聖旨轉臣一官者聞命感
懼措躬靡安竊以賦祿之等所以馭群臣成憲之頒
所以詔萬世而臣頃以愚陋濫預典司方朞徒屬稟
之初雖粗窺於凡目逮成書奏御之日已阻望於威
顏敢謂第名例叨增秩曲荷乾坤之施不忘簪履之
遺伏念臣孤負大恩退安真館居閑有祿每懼挺災
受賞無功豈忘畏義輒陳愚悃上瀆 聖聰伏望特
軫慈憐收還寵命非止獲安於私分亦欲免累於公
朝臣仰望行闕無任懇倒迫切之至謹具劄子陳免

以聞伏取 進止

辭免 勅令所修書成轉官第二劄子

臣十月十三日准 行在都進奏院遞到告一道以
祿秩新書成轉臣一官及奉 詔書以臣辭免上件
恩命未蒙矜允者天地之恩固欲從厚螻蟻之志終
冀獲申罔避黷煩薦形敷叙竊以上之行賞無濫則
人勸下之被賞無愧則身榮授受之間得失所繫儻
事功之未稱顧分義之何安貪得不言冒榮孰甚惟
新書定祿秩之等命近臣兼提督之官雖用故常曾

蒙委使而討論公革衷輯散亡則有司存在臣何力
矧復屬稟之始臣已去朝歷時之多書方奏御而臣
論功無有受賞何名褒典橫加驚惶失措是以輒陳
奏牘力具懇辭兪旨未頒危衷益懼此雖 陛下

親乘戎輅赫然有爲之時而臣退安祠官冒此無功
之賞人誅鬼責將不赦臣公議私情皆恐累國思念
朝夕怵惕冰淵伏望 宸慈特回 天聽察臣愚悃
實非飾辭矜從既竭之誠追寢已成之命庶於素分
行以少安仰望 行闕臣無任懇倒迫切之至所有

告命臣見寄納湖州軍資庫不敢祇受謹再具劄子
陳免以聞伏取 進止

辭免 勅令所修書成轉官第三劄子

臣近蒙恩以祿秩新書成轉臣一官臣自揣無功輒
嘗再具陳免今月二十四日准尚書省劄子奉 聖
旨依已降詔旨不允恭惟 聖恩至渥承命感激涕
泗交流然臣於義終有未安須至備瀝血誠復免
天聽伏念臣衰病無庸之身投閑田野仰蒙 陛
下記憐假此光寵在臣私分豈不知榮臣儻有一毫

之功可以稱塞及於近例可以扳援臣亦何敢於此
軍旅事繁之際喋喋控叙至于再三上瀆 威尊自
干斧鉞誠以此書之作臣實略無勞效固已於前兩
次奉劄具述本末兼臣竊見紹興新書之成自詳定
官而下第增爵秩提舉官則不與也今臣身既去位
乃獨蒙此褒遷反覆思之無一而可 陛下遇臣
之恩則過於厚矣而臣辭受之義所當盡者敢不披
露於 君父之前伏望 陛下回日月之照察蠲

蟻之誠曲軫 宸慈收還成命豈惟免微臣冒寵之

懼庶不累 朝廷勸賞之公所有告命見寄納湖州
軍資庫不敢祇受仰望 行闕臣無任懇倒迫切之
至謹再具奏劄陳免以聞伏取 奏進止

乞回受 勅令所修書成轉官與兄監獄劄子

臣今月初二日准尚書省劄子以臣辭免轉官恩命
奉 聖旨依累降詔旨不允者尤官無尺寸之功難
勝誤賞瀝懇有再三之瀆宜就嚴誅過蒙寬宥之恩
終闕矜從之旨愧益深而汗溢感彌極而涕流伏念
臣家世至寒資材甚下被服父兄之訓偶玷儒科遭

遇聖神之知寔污政路比投閑散猶荷記憐稱效云
何僥倖如此粉身碎首曷足報償履薄臨深每知恐
懼輒恃天地包容之量復陳犬馬冒昧之誠重念臣
尤右廸功郎監潭州南嶽廟某少習藝文久困場屋
晚霑恩命甫列選階念暮年手足之情豈忘牽愛顧
平日肺肝之懇不敢及私茲緣異恩庶均同氣仰祈
聖造曲軫 天慈特許以臣今來所轉一官回授與
臣兄某循轉施行將侈朝廷之寵光用增門戶之榮
耀屢瀆 宸聽萬歎奚逃 臣無任瞻天望聖祈恩俟

罪跼踖屏榮之至謹具劄子奏請以聞伏取 進止
辭免除在京官觀侍讀第一劄子

臣今月 日准 行在入內內侍省金字牌遞到
尚書省劄子奉 聖旨除臣提舉萬壽觀兼侍讀日
下起發赴 行在所供職者聞命跼踖感涕交流伏
念臣頃以勑授固陋之質誤被眷知擢自小官至陪
大政一毫無補百謫有餘仰蒙從欲之仁俯徇投閑
之請思愆里舍僅閱歲時雖存闕之心不忘造次而
歸田之幸甫迫衰殘敢圖 聖恩驟加收召露門勸

讀殊庭奉祠此在累朝實爲貴老優賢之地如臣碌
碌併冒寵除分非所安兢 惶失措然方 陛下

親乘戎輅力圖恢復之日在臣子之義豈不欲一望
清光少伸志願而叨塵非據定致煩言深自省循進
退惟谷伏望 陛下特軫 天慈追寢成命俾臣

仍舊外祠休養疾病他日儻或未填溝壑誓期糜殞
少荅鴻私臣近爲感冒風濕左足筋攣日下起發未
得見服藥調治稍可支梧卽迤邐前路聽候指揮謹
具劄子陳免以聞伏取 進止

辭免除在京官觀侍讀第二劄子

臣今月十二日辰時連准行在入內內侍省金字牌遞到尚書省劄子以臣近具辭免新除恩命正月十一日三省同奉聖旨不允令學士院降詔依已降指揮疾速赴行在所者仰感聖恩涕泗橫臆臣聞君命召不俟駕而行考於禮經固有明訓而臣驚愚朴陋一無寸長伏蒙陛下曲軫宸慈不忘舊物召以一節之峻俾近天日之光生歿肉骨之恩至深至厚非臣糜殞所能稱塞義當奔命引途豈應少緩而臣衰病日迫志意瞶昏誠恐無以上副眷知遂瀝懇私乞賜追寢成命今來疊於疾置被奉聖旨趣行而臣稽違詔令罪將無赦夙夜震懼若無所容臣已於今月十四日力疾上道迺遽前路聽候指揮臣無任戰灼之至謹具奏聞謹奏為病未及朝見奏知劄子

臣近蒙聖恩除臣提舉萬壽觀兼侍讀臣以疾病餘生愚陋朴拙自度無以稱塞瞻知夙夜惶懼嘗瀝懇誠乞寢成命而九日之間兩奉詔書四次被受

御前金字牌降到 聖旨指揮催促起發念方
陛下戎輅親巡之際在臣子之義迫於嚴命不遑安
處遂力疾迤邐前來已次 行闕然臣所患左足筋
攣之疾痛楚呻吟至不可忍公路服藥調理尚未全
安有妨久立欲於門外將息一兩日趁赴朝見臣無
任戰灼之至謹具劄子奏聞伏取 進止

辭免除同知樞密院事劄子

臣准尚書省劄子正月二十一日三省同奉 聖旨
除臣同知樞密院事仍降申使宣押赴院供職者聞
命震驚罔知所措竊以輔臣之任國論所資况當用
武之時尤重本兵之寄欲贊能事宜得偉人庶協成
謀用戡多難如臣資材凡瑣性識昏智慮不足以
度萬事之宜權略不足以應一時之變頃蒙 聖獎
擢與政途昧於謀國已試無能久冒殊榮曾微薄效
陛下略其碌碌尸位之罪察其拳拳憂國之誠得請
外祠甫踰旬月遽頒召節趣侍經帷旣獲望於威顏
卽再申於愚悃覬收蹤跡復返丘園豈圖異除薦及
庸品承命之次顛汗憂惶臣疾病交攻衰殘日迫儻

或更叨委任必誤瞻知伏望 陛下特軫深慈追
還成命疇咨人望用厭輿情庶資經濟之謀以成恢
復之業臣無任懇倒迫切之至謹具劄子陳免以聞
伏取 進止

辭免除知樞密院事劄子

臣伏蒙 聖恩除臣知樞密院事聞命之次跼蹐靡
安伏念臣頃以至愚極陋之質久污近聯績效無聞
退安散地 聖恩記錄遽有經筵之召扶持疾病甫
及造朝亟被詔除進陪右府而臣已試無狀瀝懇再

三 天聽莫回俯僂就職方欲勉竭駑鈍少報萬分
而才分所拘未有尺寸之效內懷慙懼背若負芒忽
蒙超遷莫測所以驚惶顫汗無地自容 陛下之

恩遇 臣過厚而 臣所自揣素不知兵旣無策畫仰贊
廟謨又無事功下厭人望冒處機衡之地已爲非分
而居位未幾復此叨逾歷尋前修未有其比天下公
議其將謂何必至顛隳重累國體伏望 陛下廓
天地之照察螻蟻之誠特軫深慈追還成命俾 臣仍
舊職任夙夜黽勉庶幾萬一或能少副 陛下責

任之意而臣之罪戾亦可得以少寬不勝幸甚謹具
劄子陳免以聞臣無任祈哀俟命迫切屏營之至取
進止

啓

代賀帥臣平寇啓二首

帥旗爰舉計出萬全賊壘旣平功成一戰吏復專城
之治民還按堵之居和氣遂充懽聲頓溢伏願某官
胷吞萬象心貫兩儀誠節著乎朝端威名行乎海表
龍韜決策廟堂推必勝之謀虎帳運籌彝鼎載已成

之績憤無知之狂寇干有赫之明威慨然請行期以
奮殛具嚴師律靡須遺鏃之勞克定侯藩俄靖入鄆
之警屈此羣醜釋其下人使恩信之兼施知勲庸之
益大顧惟弱植獲佐偏州覩捷奏之交馳激懦衷而
竊抃

陳師鞠旅旣燁威靈折馘執俘遂平寇虐悉復藩垣
之治用昭帷幄之謀慶溢人神懽均遐邇恭惟某官
忠存衛社業茂安邦威加草木之微信及蠻夷之遠
辟國百里嘗參總於戎昭教民七年因繕修於武備

舉無遺策動有成功屬鼠竊之貪饕命鷹揚而翦滅
果憑勝算亟正嚴誅一空逋藪之羣永息潢池之盜
事皆按堵民乃奠居建大將之旗往旣殄於佞蔡仗
元戎之節令復類於平吳允集茂勲宜膺殊獎佇觀
英袞之就拜庶慰高牙之請行乃眷偏州實臨孔道
欣覩奏功之日幸臻徹警之期抃躍之私倍萬常品

代漕臣謝寇平除職啓

轉餉千艘初無異績賜書一札遽有橫恩籍通內閣
之嚴名竊外臺之重是爲踰分祇以起羞竊念某遭

世聖明奮身踈迹洊被乘輅之選悉緣推轂之私自
去東州竭來南土適寇攘之竊發會師旅之企興已
責薄征詔必深於恤隱蒐兵筭食法又戒於愆期懼
心計之弗克念力行而勿憚迨聞捷奏仰寬顧憂底
藩維之告寧皆帷幄之制勝罪逃逋慢災已免於求
魚命出超踰夢輒因而分鹿靜言忝冒備見矜憐此
蓋伏遇某官亮節立朝深誠許國有容德乃大包賢
否於光堯嫌名中不私物亦公置是非於度外顧未遺於
下體茲不墜於上聞致使孱微亦叨甄錄某敢不誓

修乃職圖報此恩食藥飲冰將益堅於操履飛芻輓
粟何敢誤於使令

代賀人得郡啓

伏審就被帝綸改臨侯服先聲所暨衆志已孚共以
某官行配古人名滿當世汪洋德量韜玉海之千尋
卓犖詞源瀉銀河之萬丈蚤由簡注寔歷清華薦乘
使者之輶爰正儒宗之席斯文所託吾道旣行載在
典刑尤以老成爲重溢爲吏事皆其緣飾之餘是膺
師帥之除用壯藩垣之勢顧惟弱植久仰崇規茲獲
佐於下風實使償其素志依歸抃躍倍萬等倫

代賀兵部尚書啓

伏審䟽恩內朝正位右省推政本於天下統兵權於
禁中國勢增崇輿情協慶恭以某官配古遺直爲時
老成清忠格於天淵沈謀驗於著蔡器優大受文武
唯所用之德合中行左右無不宜者逢辰熙洽歷位
高華欲加澤於斯民力告猷於乃后霜臺峻峙歎松
栢之後凋天路廓清見藜藿之不採俾周旋於從橐
示登進於公槐爰陟夏官進司武部上意所注正想

聞於履聲僉論攸歸茲願嘗於鼎實其早登驥坂久
去龍門莫遂趨風長恨一涯之隔迨茲承命第勤三
賀之私

代賀中丞啓

伏審茂膺宸綽榮總臺綱除音下傳士論胥慶恭以
某官爽邦巨哲名世碩儒道積於躬固絕磷緇之變
義陳於色曾無吐茹之嫌志欲有補於時言皆不詭
於聖自結上心之眷倬觀吾道之行慷慨百爲夷險
一意迨被賜環之召益敦前席之知更直掖垣共推
敏翰冠登學省獨號純師屬中司之久虛委專席而
顯拜絳騶分路已崇堂陛之威白簡飛章必識朝廷
之體卽期柄用彌峻巖瞻某遠跡崇閣庇身支郡莫
預拜塵之列但馳賀厦之誠

代賀林中書知揚州啓

伏審誕揚休命就起宗工總祕殿之崇資控中都之
巨屏巖瞻所逮輿頌惟欣恭以其官道濟寰區忠存
社稷殊勲光於盟府舊德冠於公朝凜凜格言常破
萬人之浮議堂堂壯節自聳四夷之野心名家獨富

於文章餘事兼資於翰墨周旋滋久左右具宜遂符
夢卜之求早預機衡之任一心一德聳表儀於百工
嘉謀嘉猷大規摹於四海方需正席孔樂均休復辭
管籥之嚴歸踐林園之勝上心彌簡民望益孚大燾
高牙復壯藩維之勢命圭相印卽還輔弼之聯斯言
可期指日以俟某猥繇使事阻望台光聞上天之除
昏唯知舞蹈望日邊之歸路預切瞻依

代人與尚提學啓

絳帷邃密橫經嘗列於下陳金節光華歛板復參於
前導何幸師資之舊輒居部屬之餘喜溢心顏榮生
步武竊念某天資至昧人品甚微拙如吐墨之魚勤
類蝕書之蠹十年太學功屢失於幾成五郡洋林身
更同於歷聘昨假鄒君之館適畱吳會之區

光堯
嬾名中

之地許游繆因志鵠戶外之履常蒲特俾升堂侵尋
歲月之賒蹭蹬功名之會猥從世祿羞負已知鼓餘
勇以當方銳之師出遺筭以雪累戰之耻技已殫矣
幸而得之從新進之衣冠號貴游之子弟嘶風志在
雖知塞馬之還望月心驚殆有吳牛之喘徒以爲貧

而仕豈能擇地而安來掌市租實司津鑰坐念塵容
之抗益負初心聿瞻星使之飛庶償大願伏惟其官
心源卓犖才刃縱橫聳野鶴之奇姿肖石麟之異稟
曾吞萬卷居有雋聲氣壓千人往無堅對未陟禁塗
之要聊從使傳之榮會殿最於列城職高論秀分涇
渭於群吏任劇廉能顧惟虛薄之資夙荷作成之賜
矧於此地辱在所臨雖不能載劍分庭干部使者之
譽或庶幾摳衣造席執門弟子之容

代人轉官賜第謝宰執啓

比膺帝睠亟進官聯仍拜賜於芝函遂登名於桂籍
寵光橫及感涕交流伏念某性昧知方才踈適變少
而遊學不能收場屋之功晚乃遭時已叨塵侍從之
列荷大鈞之曲造懼小器之疾顛每寃勤劬勉圖稱
塞技已窮而難彊力弗給而易疲至如餉饋之薄勞
乃是轉輸之常職俾之增秩固慚恩數之優假以決
科更使品流之異自惟何者獨得兼之此蓋伏遇某
官道濟寰區功存廟社削除醜類旣恢經武之圖旌
別群材更助右文之化故捐殊賞以賁微軀某敢不

竭節奉公推誠享上謹邦國貢輸之備識朝廷法令之宜庶幾此心何敢云報

代謝除發運啓

誤膺詔旨陞總計權顧名謂之加隆揣事功之靡稱寵榮所逮慚懼惟并伏念某井谷地寒蝸鳩才小出遇明良之會擢從冗散之聯寢被躡除濫當將漕雖百骸盡瘁訖無足國之深謀而一意首公徒有愛君之大節比更再歲遽閱三遷心已愧於超踰力方圖於稱塞更叨異數就進崇資狎承旒棨之恩默識陶鎔之自此蓋伏遇某官精忠冠古端行表時言爲社稷之遠圖動合國家之大體高又碩學雅推多士之宗明德茂勲益著百僚之望遂於踈逖亦不棄遺謂其旣塵清切之班使之增重光華之任敢不恪遵乃職期副所蒙誓畢餘生已作報恩之計庶幾薄效不辜責實之朝

代謝轉官啓

入告元勲已誕揚於顯冊徧行殊賞乃橫及於微軀亟被恩言徒懷感臆伏念某起從踈逖誤玷選除寢

庸寵數之過優每愧器能之弗稱頃緣移使方屬整
兵峙乃糗糧偶無餉饋之乏于彼原隰與有馳驅之
勞蓋職分之當然顧事爲之安在驟叨增秩采懼罔
功此蓋伏遇某官威格華夷志存廟社憤兇徒之竊
發出妙略以請行運籌帷幄之中旣空蟻聚還師祗
席之上爰振虎臣遂軫念輸將之勤亦聯名慶賜之
列某敢不恪遵乃職圖稱所知庶以奉法循理之心
可爲推賢與能之報

代賀翁中丞改知杭州啓

伏審拜恩中道更鎮近藩凡屬統臨交深欣畏恭以
某官才推英傑德懋中和親逢聖主之知自致風雲
之會紫荷持橐久參帷幄之謀白簡飛章悉正朝廷
之體頃被天綸之渥暫分畫錦之榮克殄寇攘用蘇
疲瘵作軍謀帥方加賁於殊功視邦選侯遂改臨於
大屏定見賜環之亟靡容開府之淹歸踐廟堂下澤
寰海某繆當支郡行託餘麻顧惟慰幸之多豈在等
倫之後

代賀胡提刑啓

伏審光被帝綸寵更使節威聲所底樂誦惟均恭以
其官雅望鎮浮周才應變所至可紀有前古吏師之
風無施不宜皆一時國論所倚比奉凝旒之對式符
側席之求嘉謀適陳明命已出輶車一乘蓋欲重持
斧之權細札十行恐遂趣賜環之召顧惟晚晚辱在
庇麻行拜旌旗之光敢修竿牘之禮欣幸之劇倍萬
常情

代賀張舍人啓

伏審拜恩宸陛進直掖垣休命播騰輿情欣屬伏惟
某官氣蓋一世心雄萬夫煥星斗之文追配作者起
雷霆之譽蔚爲聞人有連中八科之名無紛亂諸事
之誚蚤從麟閣盡讀未見之書旋列螭坳更著不刊
之典蓋善爲訓誥誓命之煩悉必能道德意志慮之
精微果被顯除遂居華選靖其一節共識傳昭之古
風通達百爲當問崔琳之今事嗣觀綸綍之出趣預
廟堂之游某蚤辱論交茲聞得位上以贊朝廷之喜
下預有鄉閭之榮

代賀韓舍人啓

伏審近奉制函遂登辭掖人望所屬士論爲榮伏惟
某官諸儒楷模三代豪傑揚雄於蜀本著書成後世
之名馬周入關因抗章言天下之事褒語一下英聲
四馳蓋不爲世俗無用之文則已識公輔有爲之器
其間流落公言謂何及此選除上意決矣然以辭令
贊書之任而付討論潤色之才此優爲之何足道者
一時製作孰能居蘇賈之先他日設施自當在常楊
之上某預游滋久聞命甚休睠江湖之一麾阻門闕
之三賀忻懽素志倍徙常情

代賀宣撫啓

伏審告廷明命復位元樞嗣開莫府之嚴遽捨安車
之佚事關國體喜動民情竊以填撫四夷爲上公之
任典護諸將乃元帥之權去就之間重輕所繫故師
連西海疆衛公之一行而寇警朔方賴長平之復出
勲盟旣固史牒用光恭惟某官位冠宗工望隆元老
攄尊主庇民之志成開疆辟土之功鷹揚四方鸚立
一世威稜遠愴顧草木之皆知忠列具存宜藜藿之
不採頃緣振旅因欲奉身上心雖憫於獨賢輿論已

知其復用果承溫詔再撫全師蓋邊陲無折筆之勞
則宗社有覆盂之勢虜謂吾父當厭難於階楹人歌
我公卽還師於衽席斯言可必萬口所同某辱在播
鈞喜聞推轂徒以一麾而出守莫陪十乘之啓行并
躍私情倍百常品

代賀太宰啓

伏審告廷坦制正位冢司百辟具瞻萬邦胥慶竊以
歷觀論相之重深識守文之難終寧考之圖功時方
紹復條先帝之故事自足施行乃登用於舊人以付

畀於大政務飭治體不求智名恭惟某官盛德庇民
殊勲冠世蚤收四海之問望更練三朝之典章上所
注懷從甘盤之舊學國有決議咨方叔之壯猶直道
事君正色率下備受大臣之體貌綽有故舊之風流
衰職旣虛巖瞻彌峻遂定金甌之卜首居玉鉉之聯
華夏系心方資霖雨之澤搢紳屬目共仰中台之明
某托命洪鈞庇身支郡逖想雲龍之會阻陪鳧藻之
權抃躍之私名言莫旣本由天卍之文奉爲神而制
爲審代賀少宰啓

伏審讀命路朝正儀揆席真儒登用庶類昭蕪天下
幸甚竊以聖賢之相逢本由天地之交泰爲時而降
非人所能選於衆而舉臯陶雖曰疇咨之命審厥象
而得傳說是爲帝賚之祥自昔傳聞於身親見恭惟
某官柱石王室股肱帝躬身繫朝廷之重輕心關宗
社之休戚開拓萬里成超今冠古之功救寧四方致
尊主庇民之業道洽政治謨明弼諧使邦朋之寢消
識國是之素定遂符夢卜進總機衡必將盡行平日
之言然後散爲天下之福轉洪鈞之一氣時適純熙
深輸寫奚旣

代潁州王待制謝執政啓

馳驛再朞偶逃吏議分符千里又玷國恩控畿甸之
上游卽溪湖之勝踐過客稀少絕厨傳將迎之勞居
民雅馴無訟牒刺裁之冗筋骸就佚顏面興慚伏念
某奮身孤平逢世熙洽偶緣奔走之薄效遂階侍從
之榮班然最下之考累書當有餘責而至愚之慮已

試實無他腸仰荷廟堂之知俾參禁密之籍未收績
用更以名聞付之牧養之權遂此便安之願此蓋伏
遇某官佐佑真主師保群黎明德茂勳已濟登三王
之治深謀至計更成一六合之風旁求心膺之臣出
守股肱之郡有如庸懦亦冒選除某敢不勉勵夙宵
恪修職業期稱責成之政庶遵畫諾之規

代賀右丞啓

伏審寵拜制函進登政席四方引領百辟傾心伏惟
慶慰恭以其官學瞻儒宗才高王佐昔在隱約公輔
之望已隆久於禁嚴神聖之知益簡豈惟擅燕許之
大筆居常罄稷契之忠言天日下臨風雲交會議已
馳於域外禮遂絕於坐閒立太平之基方播鈞已成
萬物開衆正之路將築館以待羣材自省微生竊叨
大化懷守臣之紱坐閱歲時掃相國之門動形夢寐
依歸抃躍倍百等夷

爲戶部葉尚書回諸路使者啓
比者誤膺詔綍叨總計庭蓄藏刑弊之餘九征多闕
調度經常之外百費交興揣懸薄以奚堪冒寵榮而

更懼豈謂某官過持謙柄遠責慶函敦意愛之周旋
粲文辭之曲折光華所照衰朽爲慚念王室之孔難
倚使臺而甚重舟車並湊方資指畫之勞門宇相望
猶阻承瞻之便感銘徒切敷叙曷殫

代謝還任啓

罪當遐棄方解組以去官恩許終更復旋艦而就事
召驚覓於一夕九升之際收渙汗於終朝三褫之餘
喜動親顏寵孚民聽荷旒宸廓乾坤之施不求其初
念閔牆矜簪履之遺乃至於此捫心惕若攬滄漚然

伏念某弱植易搖駑筋難彊頃從使傳誤被詔除延
閣通班假一麾於南國故鄉在望足三釜於北堂徒
黽勉於夙宵但糜捐於歲月蓋投閑置散者分所當
得而撥煩劇劇者才豈能堪積此叨踰至於汰罷上
累藏疾納汙之德中懷省愆念咎之疑或謂他腸此
所告者過也自憐孤迹誰與改而正諸詎意台光下
臨部屋皆照致膺申命獲返故棲此蓋伏遇某官莊
重鎮時高明拔俗英文敏識本三代儒學之宗忠言
嘉謀亦一時國論所倚居然真輔相之器綽有賢父

凡之風民皆系心上已注意殊庭澹漠叅九華妙會
之先清禁凝嚴列五閣英游之冠然猶吐握下士寤
寐招賢博收豪傑之才共佐光華之旦就如艱拙亦
在記憐務盡掩於過差使曲全於終始某敢不堅持
一節力報萬分無它技能愧承乏江海之上不相背
負誓託命鑪錘之間感激深深喻言曷旣

沈忠敏公龜谿集卷第八終

